

Sommaire

6100 - Projet de loi concernant le budget des recettes et des dépenses de l'État pour l'exercice 2010 (suite)

- Exposé de M. Luc Frieden, Ministre des Finances

Au banc du Gouvernement se trouvent: Mme Mady Delvaux-Stehres, MM. Luc Frieden, Jean-Marie Halsdorf et Marco Schank, Ministres.

(Début de la séance publique à 15.00 heures)

► **M. le Président.**- Ech maachen d'Sitzung op.

Huet d'Regierung eng Kommunikatioun ze maachen? Dat schéngt net de Fall ze sinn.

Mir héieren dann elo den Exposé vum Här Finanzminister Luc Frieden iwwert de Statsbudget fir d'Joer 2010. Den Här Finanzminister Luc Frieden huet d'Wuert.

6100 - Projet de loi concernant le budget des recettes et des dépenses de l'État pour l'exercice 2010 (suite)

Exposé de M. Luc Frieden, Ministre des Finances

► **M. Luc Frieden, Ministre des Finances.**- Här President, Dir Dammen an Dir Hären Deputéierten, de Budget 2010 gëtt hei am Parlament diskutéiert an enger Zäit, déi wirtschaftlech, sozial a finanziell keng einfach ass. Keng einfach heiheim a keng einfach am Ausland. Eiem Land geet et wirtschaftlech net gutt, mä et geet em besser wei villen anere Länner an Europa an an der Welt. Nach ni hate mer an der Europäescher Unioun an och an der Eurozon, déi Länner also, déi den Euro als gemeinsam Währung hunn, e wirtschaftleche Réckgang vu 4% vum Bruttoinlandsprodukt a bal gradesou en héijen och hei zu Lëtzebuerg.

Et ass evident, dass Konsequenzen op d'Statsfinanzen an op den Aarbechtsmaart an esou enger Situatioun inévitable sinn an och staark ze spiere sinn. D'Fro, déi sech der Regierung beim Budget gestallt huet, ass: Wéi reagéiert een op déi dote Kris, a wat ass dat Bescht fir eist Land no der Kris? Wëssend, dass dës Kris eng global Kris ass, also eng, déi d'ganz Welt ëmfaasst, all Wirtschaftssektor och betrëfft. An dat ass och e groussen Ennerscheid mat de Krisen, déi mer an der Vergaangeneheet kennt hunn, déi meeschtens ee geographeschen Deel vun der Welt oder ee Wirtschaftszweig betrëfft hunn.

Duerfir huet natierlech an deem dote Kontext d'Budgets- a Finanzpolitik eng besonnenesche Bedeitung, well et ass d'Schlësselinstrument vum politeschen Handele ganz sécher während an no der Kris.

Ech soen och an deem Kontext gären hei zum Ufank vu menger Interventioun am Numm vun der Regierung der Finanzkommissioun vum Parlament an hirem President Michel Wolter, all de Membere vun der Finanzkommissioun a besonnenesche natierlech dem Budgetrapporteur, dem honorabelen Här Lucien Thiel, villmools Merci fir déi vill Aarbecht, déi se am Besuch op de Budget gemaach hunn, mä och déi Analys, déi se gemaach hunn an déi sécherlech wäit iwwert dat erausgeet, wat de Budget 2010 u sech eleng gefuerdert hätt. Dat ass hëllefreich. Sécherlech kann deen een oder deen anere mat deem engen oder anere Saz eng ënnerschiddlech Meinung hunn, mä et reegt un zur Diskussioun. An ech mengen, och dat ass wichteg, wa mer wëllen d'Finanz- a Budgetpolitik als Grondlag vun den anere

Politiken hei am Land ugesinn, déi se ganz sécherlech an dësen Zäiten och ass.

D'Fro, déi mer eis haut hei wëlle stellen, ass déi: Wou sti mer? A wou gi mer hin? A wat fir engem Kontext steet dës Budget fir d'Joer 2010 fir d'Regierung? An ech géif och duerfir versichen, vläicht fir d'éischt e Bléck ze werfen op d'wirtschaftlech an d'finanziell Lag, an där mer fir de Moment sinn, kucken op de Budget 2010, dee fir d'Regierung d'Antwort op dës Kris ass, mä och versichen, e bëssen op d'Period vun dëser ganzer Legislaturperiod ze kucken.

Dës ass deen éischte Budget, wéi Der wësst, vun där neier Regierung, déi aus de Wahlen vum Summer ervirgaang ass. Wa mer d'Situatioun kucken, déi wirtschaftlech Situatioun an Europa, da stelle mer en fait fest, dass mer an deene leschte Joren, an all deene leschte Joren an der Moyenne an der Eurozon iwwer null waren. Mir hatten also eng positiv Wirtschaftscroissance. An 2009 ass déi erstmalig zënter laange Joren op e staarke Minus zrëckgaangen, an d'Europäesch Kommissioun an hiren Hierschtprevisiounen schwätzt vu minus 4%. D'Europäesch Kommissioun mengt och, dass 2010 an 2011 mer erëm liicht iwwer 0% wäeren, nämlech 0,7% fir d'nächst Joer an 1,5% fir d'Joer 2011.

Wat Lëtzebuerg ubelaangt - an do gesäit een och, dass sech déi nämlech Tendenz erëmispigelt -: Mir hatten ëmmer e positive wirtschaftleche Wuesstum, mä mir hatten net nëmmen e positive wirtschaftleche Wuesstum, mir hatten en extrem héije wirtschaftleche Wuesstum, an esou hate mer an der Period 2002 bis 2006 eng Croissance annuelle vu 4,2% vum Bruttoinlandsprodukt. Et goufe Joren, wou dat souguer nach driwwer war. Ech huelen nëmmen d'Joren 2006, 2007.

An dunn, wat ass geschitt? Vun 2007, wou mer nach eng Croissance hate vu 6,5%, si mer 2008 op null Prozent erof gefall. An dës Joer gëtt dervun ausgegangen, dass mer e wirtschaftleche Réckgang vu minus 3,5% hunn. Fir d'nächst Joer mengt d'Europäesch Kommissioun, dass mer 1,1% Wuesstum hätten, an 2011 1,8%.

Elo ass a wirtschaftlech schwierigen Zäiten ëmmer d'Aschätzung vun der wirtschaftlecher Croissance schwierig. Ech mengen awer, dass déi Chifferen, déi d'Europäesch Kommissioun virgeluecht huet, opgrond vun all deenen Informatiounen, déi eis zougänglech sinn, relativ realistesch sinn. An et sinn och déi nämlech Chifferen, déi d'Lëtzebuerger Regierung geholl huet, wéi se de Budget fir 2010 opgestallt huet.

Mir hu gesot, dass eise Budget op enger Wirtschaftspregressioun baséiert vun tëschent engem an annerhallwem Prozent; dass ass also en ligne mat de Previsiounen vun der Europäescher Kommissioun. Déi si manner héich wéi déi, déi de Statec viru kuerzem virgestallt huet, déi eis net disponibel waren, wéi mer de Budget gemaach hunn. Ech mengen och, dass dee Modell, dee vum Statec gebraucht ginn ass, vläicht ze vill e mathemateschen, op d'Vergaangeneheet opgebaute Modell ass an net alle Contrainten, déi och d'Lëtzebuerger Ekonomie betreffen, Rechnung dréit.

Fakt ass a Fakt bleift, dass mer konfrontéiert si mat engem enorm staarke Réckgang, egal, ob et 1, 1,5 oder 2% ass, well

mer koumen, wéi ech et virdrun erënnert hunn, vu 6,5% op null an elo dann 2009 op ongeféier minus 3,5%.

2010 an 2011, soen all déi statistesch Ämter, geet et e bësse besser. Mä et muss ee gesinn, dass dee Wuesstum an enger historiescher Perspektiv extrem schwach ass, an och wann ee kuckt, op wat fir enge Wuesstumshypothesen eis Budgetpolitik, mä och eis ganz Politik vun der sozialer Sécherheet opbaut, dann hate mer eis do un aner Prozentsätz gewinnt wéi déi, mat deene mer elo konfrontéiert sinn.

Frappéiere muss een d'Brutalitéit vun der Kris, wéi schnell vun engem Joer zum aneren de wirtschaftleche Réckgang ze verzechnen ass. An zu Lëtzebuerg si mer natierlech dovunner déck betrëfft, well Lëtzebuerg ass logescherweis, weinst der Klengeheet vun eiem Territoire, eng ganz oppen Economie. Vill vun eise Secteure lieve vum Export, sief dat vu Gidder oder vun Déngschtleeschungen, a mir sinn natierlech vun där Kris duerfir och am selwechte Mooss betrëfft.

Dee schwache Wuesstum, dee mer an Europa gesinn, Wuesstum, deen zum Deel iwwregens dohier kënn, dass déi eenzel Länner zolidd Konjunkturprogramme maachen, also staatlech Ennerstëtzung vun der Economie ginn, dee geet net duer fir déi wuessend Aarbechtslosegkeet an Europa ze bremsen oder fir déi zolidd zrëckzeféieren. Déi hëllef, dass net nach méi Leit an d'Aarbechtslosegkeet kommen. Mä déi Situatioun, an där mer fir de Moment sinn, déi huet net an Europa derzou gefouert, dass fir de Moment d'Aarbechtslosegkeet zrëckgeet.

Fir 2007 an 2008 hate mer an Europa, an der Eurozon op d'mannst, eng Aarbechtslosegkeetsquot vu 7,5%, an 2011 geet d'Europäesch Kommissioun dervun aus, dass mer op 11% souguer kommen an der Eurozon. Dass ass vill, dass ass vill méi wéi zu Lëtzebuerg, wou mat ronn 7% da gerechent gëtt, mä all eenzelne Prozentsaz als eenzelne Prozentsaz reflétéiert esou vill Mënschen, déi hir Schaff verléieren, an dat kann engem net egal sinn an do muss ee kucken, wéi een do kann hëllefen deene Leit, wéi een do kann hëllefen der Economie, mä dass dat och nach um Enn fir e Land finanzéierbar bleift.

Et ass richtig, dass zu Lëtzebuerg déi Kris, déi an de Chifferen zolidd ass, net iwwerall an net vu jiddwerengem gespuert gëtt. Dass ass gutt, dass ass flott fir d'Leit, déi hei am Land wunnen, an dat hänkt natierlech erëm eng Kéier mat der Dimensioun vun eiem Land zesummen, well vill vun deenen, déi bis elo hir Schaff verluer hunn, wunnen net onbedéngt bei eis, et begéint ee se also mat hirem Misär net all Dag. Vill vun deenen, déi vläicht an de Chômage kommen sinn, konnten op hirer Schaff bleiwen, well mer zolidd déi Moossname konnten asetzen, déi d'Kuerzaarbecht sinn, wou de Stat finanziell deene Betriber entgéintkënn, an och aner Moossnamen, notament a verschidde Secteuren, vun der fréizäiteger Pensionéierung hunn derzou gehollef, dass d'Aarbechtslosegkeet zu Lëtzebuerg net esou staark ass vläicht wéi an enger Rei anere Länner an Europa.

Mä déi Kris huet selbsterständlech Répercussiounen, an déi Répercussiounen wäerte bleiwen op dem Aarbechtsmaart, sou wéi se och op d'Statsfinanzen zolidd Répercussiounen huet, an dat souwuel heiheim wéi an Europa.

Wann ech kucken, och do erëm eng Kéier, wéi an der Eurozon d'Evolution vun de Solden ass, vun deem also, wat felt an den nationale Budgeten, fir d'Ausgaben ze tätegen op enger reng annueller Basis, da gesäit een, dass mer an deene leschte Joren an der Eurozon schonn ëmmer en negative Finanzéierungssaldo hatten, mä dee war an der Moyenne ënnert deenen 3% vun dem Bruttoinlandsprodukt. 2008 zum Beispill war et minus 2%, 2007 war et minus 0,6%.

Erstmalig awer ass 2009 och do eng brutal Verschlechterung vun der Defizit-

situatioun an der Eurozon kommen, nämlech dass d'Europäesch Kommissioun dës Joer mengt, dass mer op minus 6 bis minus 6,5% Defizit an den Eurlänner kommen, an dat geet ongeféier d'selwecht déi nächst zwee Joer virun.

Dass ass eng alarmant Situatioun, well deen héijen Defizit an enger Eurozon heescht och en héijen Defizit fir fundamental Daten, déi eiser gemeinsamer Währung ënnerleien. Eis kann et net egal sinn, wéi den Defizit an d'Finanzéierung vum Defizit an anere Länner vun der Eurozon ausgesäit, well mer zesummen en Intérêt drun hunn, dass mer eng Währung hunn, déi eis Economie stäerkt an déi net duerch Iwwerverschuldung finanzéiert gëtt.

Déi Tendenz vun engem klengen Defizit op e groussen Defizit ass zu Lëtzebuerg bei de Solde vun eiem Budget e bëssen anescht, well mir hatten déi lescht Joren ëmmer en Iwwerschoss an eise Budgetchifferen, wann ech d'Administration publique, also alles dat, wat an Europa matenee verglach gëtt, den Zentralstat, d'Gemengen an d'Sozialversécherunge kucken.

Mir hatten an der Period 2002-2006 en moyenne en Iwwerschoss vun 0,6% vum Bruttoinlandsprodukt. Et gouf nëmmen eng Ausnahm, dass war d'Joer 2004, zwee Joer. 2004, wou mer e ganz staarke Réckgang hatten a wou mer en Defizit vun den öffentleche Finanzen vun 1,2% vum PIB hatten. Dass war also schonn eng Kéier e ganz schwierig Moment, mä deen huet sech duerno an de Joren '05, '06, '07 an '08 erëm verbessert.

Dës Joer ass dat net de Fall. Mir schlëssen of mat engem Defizit a fir d'nächst Joer - dee Budget, dee mer elo am Parlament diskutéieren - hutt Der gesinn, dass d'Regierung vun engem Defizit vu ronn 4% vum Bruttoinlandsprodukt och ausgeet. Och d'Kommissioun, d'Europäesch Kommissioun gesäit deen Defizit opgrond vun deene Berechnungen, déi si gemaach huet, an ähnlecher Héicht.

Och do ass d'Tendenz déi, déi ee muss feststellen: Vun enger positiver Situatioun an all deene Jore virdrun, mat Ausnahm vum Joer 2004, si mer op eemol an eng Defizitsituatioun gerutscht, déi en plus no deenen aktuelle Berechnungen fir d'Joer 2010 iwwert deenen 3% vun de Kritäre vun der europäescher Wirtschafts- a Währungsunioun leien.

Natierlech muss een dat, wann een d'Situatioun vun de Statsfinanzen kuckt, an engem méi breede Kontext kucken. Den Defizit ass een Aspekt, et ginn awer och nach aner Aspekter, déi ee muss kucken, an dat ass sécherlech ënner anerem d'Schold an d'Reserven, mat deenen een eventuell Defiziter ka finanzéieren.

D'Schold an der Europäescher Unioun, déi amgaange war méi kleng ze ginn, wësst erëm zolidd. An der Eurozon wäerte mer elo op 70 respektiv 80% vum Bruttoinlandsprodukt als öffentlech Schold kommen. Dass ass extrem héich. Erënnert lech och do, dass am Fong an der europäescher Währungsunioun een net dierf iwwer 60% vum Bruttoinlandsprodukt kommen. Mir sinn also an der Eurozon wäit doriwwer ewech.

Zu Lëtzebuerg, opgrond vun där Finanzpolitik, déi mer an deene leschte Jore gemaach hunn, si mer wäit ewech vun deene 60%. Mir hunn haut e Scholdestand vu ronn 15%, deen an deenen nächste Jore wäert klammen, dee fir d'Joer 2010 klëmmt - an deene Chifferen, déi mer lech virgeluecht hunn - op eppes siwe Milliarden, ronn 19% vum Bruttoinlandsprodukt.

Woubäi een zu Lëtzebuerg muss bei deene siwe Milliarden, wat historiesch vill ass, awer ëmmerhi bedenken, dass dovunner ronn 5%, also zwou Milliarden, hierkommen aus der Rekapitalisatioun vun enger systemescher Bank zu Lëtzebuerg. Dass sinn also keng Scholden, déi mer definitiv ausginn hunn, mä déi mer dee Moment, wou mer aus deem Kapital



erausginn, och wäerte récupérerieren. Sou datt een am Fong vun enger Schold vun eppes fënnf bis sechs Milliarden, wann ech dat ofrechnen, kann ausgoen.

Nach ass d'Schold eppes, wat een an enger laangfristeger Perspektiv muss gesinn. Eng Schold vun 10 oder 20% ass akzeptabel. An engem klengen Raum ass sécherlech eng Schold vu 60% net akzeptabel. Duerfir, dat, wat an Europa an a groussen Ekonomien kann e Kritär sinn, ka keen zu Lëtzebuerg sinn, aus deem ganz einfache Grond, datt mer net genuch Moyenen hunn, fir enges Daags eng zolidd Schold zrëckzebezuelen.

Duerfir kann ee sécherlech iwwer eng gewëssen Zäit och eng gewësse Schold maachen, mä Schold maachen heescht ëmmer, datt een enges Daags muss déi rembourséieren, a Schold rembourséieren heescht en fait, datt een déi Suen iergendwou muss fannen. An deene meeschte Länner féiert dat zu engem gewëssene Moment zu zolitte Steiererhéijungen.

Or, zolidd Steiererhéijungen, déi mussen déi bezuelen, déi no eis kommen. Zolidd Steiererhéijungen schueden der Economie a schueden der Kafkraaft vun de Leit, well d'Betriber ginn net an déi Länner, wou d'Steieren héich sinn, an do, wou d'Leit héich Steiere mussen bezuelen, hu se keng Kafkraaft. Also ass dat ëmmer eng Solution, déi nëmme ka ganz um Enn vun allen anere Méiglechkeeten stoen.

Fir eis, fir d'Regierung ass eng substanzuell Verschuldung och iwwert déi nächst Jore keng Alternativ. Datt een eng gewësse Schold muss maachen, grad och fir d'Joer 2010, schéngt eis normal, besonnesch wann een domadder Investissementer finanzéiert. Wann ee Schold iwwer eng laang Zäit mécht, da gesäit een an deene Länner, déi dat gemaach hunn - an et sinn der no bei eis, déi dat gemaach hunn -, datt déi enorm vill vun hiren normale Budgetsmëttele gebrauche mussen, fir d'Schold ze rembourséieren, fir d'Zënslaascht ze bezuelen. Si hunn also domadder manner Suen, fir aner Aktivitéiten ze tätigen respektiv fir d'Kapital ze rembourséieren.

Eis Schold wäert eropgoen, wäert e bëssen eropgoen, mä mir wäerte se net eropgoe loossen zu engem Niveau, wou de Remboursement an de Finanzement vun den Zënse irresponsabel wär, an duerfir mussen mer wäit ewech bleiwe vun deene 60%, déi an Europa erlaabt ginn.

Ech wëll och e Wuert hei soen iwwert d'Reserven. Zënter Jore gëtt gesot, dat nächst Joer si keng Reserve méi do. An et ass richtig, datt besonnesch a Krisenzäiten an an Defizitzäiten d'Reserve muss gebraucht ginn, fir den Defizit ze finanzéieren.

Fakt ass awer, datt mer déi Reserven hunn, datt mer déi Reserven och an deene Jore '06, '07, '08 zousätzlech constituéiert hunn. Dat heescht en fait, d'Iwwerschëss bei den Einnahmen, déi net am Budget am Ufank virgesi waren, hu mer op d'Säit gesat, hu mer an déi eenzel Investitiouns-fonge gesat, mat deene mer d'Investissementer finanzéieren.

Mir haten 2004, wéi déi lescht Regierung ugefaangen huet, eng Reserv vun 1,9 Milliarden; dat sinn also d'Avoiré vun de Fongen. Mir hu fir de Moment eng Reserv vu ronn zwou Milliarden; dat heescht also, déi nämlech Zomm nach ëmmer. Dat sinn net fräi disponibel Suen, mä dat sinn déi Suen, déi Der an deenen eenzelne Fonge fannt fir de Finanzement vun deenen Infrastrukturprojeten, déi mer an der Chamber diskutéieren oder diskutéiert hunn, an déi amgaange sinn, exekutéiert ze ginn.

Déi Zomm muss ee gesi par rapport zum Defizit, dee mer hunn. Déi Zomm déngt derzou, den Defizit, besonnesch do, wou mer Investitiounstätigkeiten maachen, ze finanzéieren. Dat ass net eng Zomm vu Suen, mat där ee ka jorelaang liewen, mä si erlaabt eis, notament fir d'Joer 2010, déi Finanzementer ze tätigen, déi mer proposéieren, kombinéiert mat engem Emprunt, deem seng Héicht een eréischt kann am Laf vum Joer definitiv fixéieren, wann ee gesäit, wéi d'genue Situation evolueiert.

Duerfir freet d'Regierung vun der Chamber jo eng Autorisation fir en Emprunt. Genue wéi vill, wäerte mer am Laf vum Joer definéieren an dann och mat der Finanzkommission vum Parlament selbstverständlech doriwwer diskutéieren.

D'Situation vum de Statsfinanze fir d'Joer 2010 muss een natierlech am Licht gesi vun deem, wat fir de Moment amgaangen ass ze geschéien. Ech hunn lech gesot, wéi mer d'wirtschaftlech Situation gesinn, déi Brutalitéit an deem Réckgang vum Wuesstum. Ech hunn lech nach eng Kéier rappéléiert, wéi de Gesamtsaldo vun de Statsfinanzen an der Eurozon an zu Lëtzebuerg ausgesäit.

Ech géif och gären hei e kuerzt Wuert soen iwwert d'Joer 2009, wat geschwé sengem Enn zougeet, quitte datt mer déi definitiv Budgetschifferen natierlech eréischt am März d'nächst Joer hunn, well eng ganz Rei Payementer, déi op de Budget 2009 lafen, bis de März d'nächst Joer kënnen getätigt ginn.

Ech géif wëlle bei de Steieren d'Chamber doriwwer informéieren, wéi déi leschte Recetté sinn, dat heescht also, d'Recetté bis Enn November. Mir si jo elo e puer Deeg nom Enn vum November. Do gesäit een och déi Tendenzen, déi mer an der Finanzkommission vum Parlament och an deene leschte Woche gesinn hunn.

Bei der Kierperschaftssteuer leie mer relativ en ligne mat deem, wat mer am Budget fir d'Joer 2009 virgesinn haten. Mä bei der Kierperschaftssteuer, wou mer fir de Moment ronn 1,2 Milliarden erakritt hunn - am Budget stoungen 1,4 Milliarden -, do muss een ëmmer berücksichtegen, datt d'Steierverwaltung natierlech déi Jore virdru besteiert an ni deen Exercice, an deem mer selwer sinn, besteiert gëtt; also keng richtig Indikation iwwert d'Gesondheet vun der Wirtschaft.

Bei der Gehältersteuer, do hu mer fir de Moment ronn 6% manner erakritt wéi beim nämlechen Zäitraum vum Joer 2008. Ech muss allerdéngs do drun erënnern, datt fir d'Joer 2009 jo eng Steuerreduktion, eng Steuerreform a Kraaft getrueden ass, an duerfir hate mer och fir dat Joer, fir dëst Joer also, scho manner am Budget virgesinn. Mir wäerte bei där Steuer, wou mer also e Réckgang hu par rapport zur nämlecher Zäit 2008, awer plus ou moins, esou wéi een dat haut ka gesinn, op dee Chiffer kommen, dee mer am Budget stoen hunn.

An dann, wat déi gréissten indirekt Steuer ubelaangt, nämlech d'TVA, d'netto TVA, déi, déi also an de Statsbudget kënn, stelle mer fir de Moment e Réckgang par rapport zum leschte Joer an der nämlecher Period vu 4% fest. Dat ass en fait déi Steuer, déi ganz no un der wirtschaftlecher Entwécklung hänkt. Déi Steuer ass par rapport zu deem, wéi et d'lescht Joer gelaf ass, an enger Situation, déi net vill vun där leschter läit. Allerdéngs, wat do vill méi frappant ass, dat ass, datt déi Croissance vun der TVA, déi mer tëschent dem Joer 2007 an 2008 haten, an déi mer gemengt hunn och 2009 ze kréien, datt déi net komm ass.

Mir haten am Budget 2009, esou wéi d'Chamber e gestëmmt huet, bei der TVA 2,2 Milliarden ageschriwwen; mir hunn der fir de Moment 1,7 Milliarden erakritt. Och wann am Dezember elo nach eng Rei Millioune bäikommen, dann ass et evident, datt op der TVA, par rapport zu deem, wat mer am Budget haten, e gréissert Lach bestoe bleift vun e puer honnert Milliounen. An dat ass selbstverständlech, well déi Croissance, déi déi Jore virdru war, a wou mer 2008 hei am Parlament gesot kritt hunn, datt mer d'TVA vill ze vill niddreg agesat hätten, hu mer se 2009 méi héich agesat, an déi war visiblement no der Kris ze héich.

D'Resultat vun 2009 wäert, wat déi gesamt öffentlech Finanzen ubelaangt, eng Situation sinn, déi mat engem Defizit ofschléisst. En Defizit, deen héchstwahrscheinlech méi niddreg ass wéi déi minus 2,3%, déi mer am September pronostiquéiert hunn. Mä dat heescht a Chifferen ausgedréckt, um Niveau vun der Administration publique wäert et tëschent minus 1 an 1,5% leien, bei der Administration centrale, do, wou de Stat also zoustänneg ass, wäerte mer bei ronn minus 2,8% leien.

Dat heescht, der Administration centrale feelt ronn eng Milliard Euro fir d'Joer 2009. An et ass déi Milliard, déi mer müssen iwwert d'Reserve finanzéieren. Eng Milliard; et sinn also ronn Chiffere mat Previsiounen, déi ee fir de Moment ka maachen, wat d'Administration centrale betrëfft. Um Niveau vun der Administration publique wären dat da ronn minus 400, 500 Milliounen. Wéi gesot, dat si provisoersch Chifferen, déi awer, mengen ech, wichteg sinn, datt ee se kuckt.

Net Rechnung droend oder net direkt iwwerdroend ass dat natierlech op d'Joer 2010, well d'Joer 2010 an d'Joer 2011, an dat gëtt oft vergiess, do besteiert jo d'Steierverwaltung dann déi Jore vun der Kris. Dat heescht, d'Kris an de Steieren an notament bei der Kierperschaftssteuer spiert een natierlech méi déi Jore duerno wéi am Joer selwer. Bei der TVA ass dat e bëssen anescht.

Et kënn derbäi, an do kommen ech herno drop zrëck, datt mir selbstverständlech zu Lëtzebuerg eng ganz grouss Volatilitééit vun eise Recetten hunn. An dat gesäit ee jo och duerch déi oppen Economie an déi Secteure vun der Economie, déi mer hunn.

De Constat ass also, datt mer eng ugespaante Finanzsituation hunn, an deem Sënn, datt mer no 2004 fir d'éischte Kéier fir dëst Joer en Defizit hunn an datt mer fir d'Joer 2010 mat engem nach vill méi héijen Defizit mussen rechnen.

Elo ass dann d'Fro fir d'Regierung gewiescht fir de Budget 2010, wëssend, datt deen Defizit géif kommen: „Wéi gi mer mat deem Budget vum Joer 2010 ëm?“ An duerfir war den Appel vu villen, och heibanen: „Da muss een direkt spueren.“ An anerer hu gesot: „Wann ee Betrib net genuch Suen huet, da muss e spueren.“

Nu kann e Betrib op Moosnamen zrëckgräifen, déi e Stat net an deem Mooss ka maachen. E Betrib, dee kann eng Rei Käschte reduzéieren, vläicht heiansdo mécht en et richtig, vläicht heiansdo ze vill séier oder ze vill brutal. De Stat huet eng ganz Rei Obligatiounen, op déi en net ka vun haut op muer, ouni dramatesch Konsequenze fir déi Leit an déi Betriber, déi dat betrëfft, zrëckkommen.

Och hëlleft de Stat de Betriber, an duerfir wär eng brutal Spuerpolitik während der Kris an den Ae vun der Regierung falsch gewiescht. Och mir hätte selbstverständlech kënnen d'Investissementer massiv zrëckféieren a mir hätten och eng Rei aner

Moosnamen kënnen huelen. Déi hätten an eisen Aen den Defizit zwar reduzéiert, mä et wär keng Äntwert op d'Kris gewiescht.

De Budget 2010 ass fir d'Regierung en Antikrisebudget, e Budget, deen eng Äntwert op d'Kris sicht, deen eng Äntwert op d'Kris an eisen Aen och fënn. Duerfir hu mer d'Dépenses op engem héijen Niveau gelooss, op engem Niveau, deen awer besonnesch héich ass do, wou mer d'Economie ënnerstëtzen, an do, wou mer Solidaritéit mat deenen, déi ënnert der Kris leiden, kënnen weisen.

Mir hunn natierlech gekuckt, éier mer ugefaangen hunn, wéi d'Recetté géifen dat nächst Joer evoluéieren. Ech hunn lech virdru gesot, datt d'Aschätzung selbstverständlech schwierig ass. An Dir hutt gesinn, bei der TVA, a liest Är eege Budgetsrieden no, wéi deemools, 2008, d'Aschätzung vun der TVA heibanne behandelt ginn ass.

Mir mussen feststellen, oder mir mengen, datt d'Recetten d'nächst Joer net op deem nämlechen Niveau bleiwen, besonnesch net wat d'Kierperschaftssteuer ubelaangt a wat d'Taxe d'abonnement ubelaangt. Duerfir hu mer am Budget fir d'nächst Joer d'Recetten ëm 8% méi niddreg agesat wéi am Budget 2009, insbesondere wat d'Kierperschaftssteuer, d'TVA an d'Taxe d'abonnement ubelaangt, wou mer all Kéiers 15% manner agesat hu wéi am Budget 2009. Ech mengen net, datt dat iwwerméisseg virsiichteg wär, mä datt dat einfach d'international Finanzsituation refléiert.

Ech soen nach eng Kéier: Eis Recetten hunn dat als Besonnescht, datt mer eng extrem volatile Recettésituation hunn. Huelte nëmmen déi Taxe d'abonnement, déi d'Fonge bezuelen. Déi hänkt un dem Boursségeschäft, op dat Lëtzebuerg, d'Chamber, d'Regierung, d'Lëtzebuerger allgemeng absolut keng Influenz hunn, wat awer an eise Budget a gudder Jore 700, 800 Milliounen erabruucht huet, wou mer fir d'nächst Joer mat 550 Milliounen nëmmen an de Budget agesat hunn.

Datselwecht gëllt fir aner Aktivitéiten, och bei der TVA, wou Finanzdéngschtleeschungen och TVA erabréngen, awer och de Commerce électronique, deen och international natierlech seng Geschäfte mécht, wou villes matspillt, niewent der Reglementation och déi international Wirtschaftssituation. An dorobber hu mer keen Afloss, mä mir liewen awer largement dovunner.

Datselwecht gëllt fir d'Accisen an den Tubak. Och do muss een ëmmer erëm drop hiweisen, wéi vill eist Land och aus deem Secteur kritt. Dat ass also och net duerfir e Secteur, deen ee kann aus dem A verléieren. Mir wäerten am Joer 2009, also am lafende Joer, eleng duerch d'Accisen um Bensin an um Diesel 800 Milliounen erakréien, an iwwert d'Recetté vum Tubak ronn 500 Milliounen. Dat heescht, Accisen an Tubak bréngen an de Statsbudget am lafende Joer an och no eise Previsiounen am nächste Joer ronn 1,3 Milliarden Euro eran. Et muss een déi Chifferen am Kapp hunn, och wann een Zukunftspolitik an Zukunftsdépenses diskutéiert.

Déi Volatilitééit vun deene Recetten ass eng wichteg. An duerfir, mengen ech och, wär et gutt, wa mer och an deenen Debatten an den nächste Wochen eis géife mat deene Chifferen auseruesetzen.

Mir hunn op der Dépensésäit - hunn ech gesot - besonnesch d'Investitiionsausgaben op engem héijen Niveau gehalen. Déi Investitiionsausgaben d'nächst Joer belafe sech op 1,8 Milliarden Euro. Dat ass eng Croissance vu ronn 11%. Och do hätt



Chamber TV

och an der Rediffusioun all Sëtzungsdag vu 19:00 Auer un



ee kënnen vläicht méi a méi zolidd spueren. Mä an der Kris hu mer dat als falsch emfonnt.

Ech soen awer direkt derbäi: Ech sinn der Meenung, datt d'Investitiouns Ausgaben zu Lëtzebuerg an deene leschte Joren ze vill schnell geklomme sinn. An et muss een oppassen, och wann een e Konjunkturpak mécht, wann een en Antikrisepak mécht, datt een net ze vill eng Ofhängegkeet vun de Betriber un d'staatlech Dépense mécht.

Et ginn ze vill Betriber haut, déi sech zu engem ganz groussen Deel finanzéieren aus den öffentleche Konjunkturprogrammer. Dat ass en allgemenge Problem an Europa, an d'Gefor ass, datt nom Konjunkturprogramm ze vill Betriber vun der öffentlecher Hand ofhängeg sinn. An duerfir ass dat och eng Diskussioun, déi mer an Europa konnte kucken, wéi mer aus de Strategien do erauskommen. Well wann de Stat alles muss finanzéieren, féiert dat natierlech zu massive Steiererhéijungen, déi d'europäesch Economie - dat ass net nëmmen e Lëtzeburger Problem - massiv wäerte schwächen.

Well Verschiddener mengen, datt dee Saz, deen ech virdru gesot hunn, net verständlech war, iwwert d'Croissance vun den Dépenses d'investissement: Et muss ee kucken, wou mer hierkomm sinn. Also d'nächst Joer gi mer op 1,9 Milliarden. Dat ass eng gewollte Politik vun der Regierung duerch de Konjunkturprogramm.

Mä mir waren am Joer 2004, also am Ufank vun där leschter Legislaturperiod, eréischt bei 1,2 Milliarden. Mir hunn also eleng iwwer eng Legislaturperiod eisen Investitiounsbudget vun 1,2 op 1,9 Milliarde gehéicht. Dat ass also eng enorm Croissance, déi gutt war fir d'Infrastrukturen zu Lëtzebuerg, déi gutt war fir d'Economie, mä déi een net à la longue ka mat där nämlecher Croissance weiderféieren, ouni d'Statsfinanzen an domadder och d'Leit, déi hei am Land wunnen a schaffen a Steiere bezuelen, ze vill ze belaaschten.

Mir wollten och an der Kris net d'Bäihëllef fir d'Betriber reduzéieren. Mir gi vill Milliounen an deenen eenzelne Secteuren - Economie, Mëtzelstand, Tourismus, Agrikultur - un déi eenzel Betriber. Mir hu ge-

mengt, datt dat gutt wär, datt d'Betriber och an der Kris géifen ënnerstëtzt ginn, wa se investéieren. Duerfir hu mer och déi Montanten am Budget 2010 bäibehalen.

Mir wollten och an der Kris d'Zäit no der Kris weiderentwéckelen. Duerfir menge mer och, datt de ganze Beräich vun der öffentlecher Fuerschung weider muss vum Stat ënnerstëtzt ginn. Mir hunn dat virun enger Rei Joren ugefaangen an dat geet och am Budget 2010 weider.


Dat sinn Ausgaben, wou een net direkt d'Resultat gesäit, well Fuerschung ass ëmmer laangfristeg ugeluecht. Mir kommen d'nächst Joer op en öffentlechen Deel vun der Fuerschung am PIB vun 0,58%. Um Ufank vun där leschter Legislaturperiod ware mer bei 0,27%. Also d'Evolutioun vun 0,27 op 0,58%, ronn 200 Milliounen sinn dat haut, beweist, a wéi eng Richtung d'Regierung do wëllt goen, fir d'Zukunft ze preparéieren.

Natierlech an der Kris - an och dat erkläert de Budgetsdefizit vun 2010, och dat erkläert, firwat d'Ausgaben am Budget

2010 zolidd klammen - hu mer de Volet vun der Solidaritéit, besonnesch mat deenen, déi hir Schaff verléieren, misse massiv ënnerstëtzen, och do missen déck zrëckgräifen op déi Iwwereinnahmen, déi mer aus deene Jore virdrun haten. Dat ass insbesondere de Fall beim Fonds pour l'Emploi, deem seng Dépenses iwwert déi lescht Jore substanzuell geklomme sinn.

A wann ech nëmmen d'Joer 2008 kucken, hate mer Dépenses am Fonds pour l'Emploi vun 380 Milliounen. Dëst Joer wäerte mer der vu 520 Milliounen kréien, an d'nächst Joer 580 Milliounen. Dat sinn also eleng op deem Fong 200 Milliounen méi vun Dépenses, déi eis noutwendeg schéngen, fir deene Leit ze hëllefen hir Schaff net ze verléieren respektiv déi, déi hir verluer hunn, erëm eng ze fanne respektiv ze iwwerbrécken déi Zäit, wou se keng Schaff hunn.

De Fonds pour l'Emploi awer wär large-ment net ze finanzéieren gewiescht, wa mer net aus deenen Iwwerschëss vun deene Jore virdru substanzuell Dotatiounen



CHAMBRE
DES DÉPUTÉS

Chamber TV
weist all
öffentlech
Sëtzung
live an integral

An der Stad
um Kanal S29 (Coditel) oder
um Kanal S40 (Eltrona/Siemens)

•

Zu Esch
um Kanal S24 / 455.25 Mhz

An der Gemeng Déifferdang
um Kanal S29

•

An der Gemeng Diddeleng
um Kanal S32

•

An der Gemeng Nidderaanwen
Kanal S29

An der Gemeng Bartreng
um Kanal S40 / 455.25 Mhz

•

Zu Walfer
um Kanal S29 / 367.25 Mhz

•

Zu Biwer an zu Wecker
um Kanal S40 / 455.25 Mhz

•

An der Gemeng Bous
um Kanal S40 / 455.25 Mhz

•

An der Gemeng Bërmereng um
Kanal S40 / 455.25 Mhz

•

An der Gemeng Konter
um Kanal S40 / 455.25 Mhz

•

An der Gemeng Dippech
um Kanal S40 / 455.25 Mhz

An der Gemeng Dikrech
um Kanal S19 / 287.25 MHZ

•

Zu Iermsdref
um Kanal S40 / 455.25 Mhz

•

Zu Esch-Sauer
um Kanal S40 / 455.25 Mhz

•

Zu Nidder- an Uewerfeelen
um Kanal S40 / 455.25 Mhz

•

An der Gemeng Gréiwemaacher
um Kanal S40 / 455.25 Mhz

•

An der Gemeng Hieffenech
um Kanal S40 / 455.25 Mhz

•

An der Gemeng Hesper
um Kanal S40 / 455.25 Mhz

•

Zu Kielen (& Brameschhaff),
Keespelt, Meespelt,
Ollem a Nospelt
um Kanal S40 / 455.25 Mhz

•

An der Gemeng Mamer
um Kanal S40 / 455.25 Mhz

•

An der Gemeng Manternach
um Kanal S40 / 455.25 Mhz

•

An der Gemeng Medernach
um Kanal S40 / 455.25 Mhz



während dem Exercice dem Fonds pour l'Emploi zouginn hätten.

Mir hunn eleng an deene leschte 24 Méint 300 Milliounen zousätzlech Dotatiounen un de Fonds pour l'Emploi gemaach. Suen, déi mer ewechgeholl hunn aus Steuer-einnahmen, fir datt dee Fong à tout moment voll kënt sengen Obligationen nokommen. An dat schéngt eis och noutwendeg an der Kris. An déi Kris ass selbstverständlech nach laang eng Kris, wann een d'Ziffere vun der Aarbechtslosegkeet an Europa an zu Lëtzebuerg kuckt.

Mir müssen also feststellen, datt mer eng ganz Rei vun Dépenses hunn, déi klammen aus deene Grënn, déi ech genannt hunn, am Budget 2010; Investi-tiounen, Investissementer an d'Zukunft wéi d'Recherche a Sozialausgaben, déi eis noutwendeg schéngen an der Kris. An op där anerer Säit si mer konfrontéiert mat enger Situatioun, wou d'Recetten zrëckginn, wou se héchstwahrscheinlech an deenen nächste Joren nach méi zrëckginn, well mer dann notament bei der Kierperschaftssteuer d'Situatioun vun der Kris nach méi spieren. An dorausser entsteet natierlech eng Differenz, déi et heescht ze finanzéieren.

Déi Differenz muss een och kucken am Kontext natierlech vun den ekonomeschen Eerausforderungen, déi sech do derbäi nach ëm eist Land stellen. D'Situatioun vun eise Banken ass vum Budgetsrapporteur hei laang diskutéiert ginn a verlaangt duerfir och net nach eng weider breet Ausföerung. Sauf fir ze soen, datt dat selbstverständlech e Geschäft ass, wat vu ganz villen internationalen Ëmstänn ofhänkt, a wat mir net eleng kënnen eis op dee Pilier, deen de wichtegste Pilier vun eiser Economie en terme de recettes fiscales ass a bleift, an deen d'voll Ënnerstützung vun der Regierung fënn, mä wou eng ganz Rei Ëmstänn sinn, déi an enger oppener Economie net eleng vun der Lëtzebuerger Regierung ofhänken.

An deene leschte fënnf Joer sinn an deem Secteur 12.000 nei Aarbechtsplaze bäikomm. Elo ginn eng Rei Aarbechts-plazen do ofgebaut a Restrukturiséierungen. Et muss een awer nach ëmmer gesinn, datt d'Croissance vun deenen Aarbechts-plazen an deene leschte Jore grouss war. Mä déi Croissance war esou grouss, datt ech net mengen, datt déi sech widderhëlt.

Derbäi kommen eng Rei europäesch Diskussiounen, och déi, déi mer gëschter erëm am Conseil vun de Finanzministere gefouert hunn, déi selbstverständlech wäerten eng Inzidenz op verschiddenen Aktivitéiten hunn, woubäi ech net allerdéngs d'Meenung vum Budgetsrapporteur deelen iwwert d'Importenz, déi just d'Bankgeheimnis fir de Private banking zu Lëtzebuerg huet.

Ech mengen, an dat ass d'Positioun vun der Regierung, déi mer och explizéiert hunn, datt dat e wichtegt Element ass, mä datt dat et net nëmme ka sinn, well ech mengen, datt d'Aktivitéit vun der Finanz-plaz eng méi breet ass an datt och et ganz schwierig ass, anzeschätze bei deem eenzelen Client, wéi wichteg dat Element ass.

Datt et en Element ass, wat d'Ënnerstützung vun der Regierung fënn, ass eng Saach; datt et en Element ass, wat vu 25 Memberstaten an der Europäescher Unioun net gedeelt gëtt, ass selbstverständlech och e Punkt, deen een hei net därerf aus dem A verléieren.

Déi Diskussiounen, déi mer gëschter am ECOFIN-Conseil, am Conseil vun de Finanzministere vun der Europäescher Unioun gefouert hunn, hu ganz däitlech gemaach, datt déi aner Memberstate vun der Europäescher Unioun net gewëllt sinn, op eng sachlech Diskussioun mat eis iwwer eng Rei vu Géigepropositionen oder -argumenter anzegoen. Déi Texter, déi vun der Europäescher Kommissioun komm sinn, an déi och an deenen eenzelnen Aarbechtsgruppen diskutéiert gi sinn, fannen d'Zoustëmmung vu 25 Memberstaten, mä fannen net d'Zoustëmmung vun zwee Memberstaten.

Mir mengen, datt deenen Ännerungen, déi Lëtzebuerg ënnerholl huet an deene leschte Joren - d'Afféierung vun enger europäescher Quellesteier, d'Afféierung vun dem Informatiounsustausch op Ufro no OECD-Modell nom G20 -, an deenen

europäeschen Diskussiounen och misst Rechnung gedroe ginn. Dat ass fir de Moment an eisen Aen net genuch de Fall. A mir hunn d'Impressioun, datt fir eng Rei Länner deesen Débat net dierf mat all sengen Implikatiounen gefouert ginn.

Dat bleift fir Lëtzebuerg e schwéieren Débat. Well eng permanent defensiv Haltung vun engem Land ass selbstverständlech och en Element vun On-sécherheet fir d'Clients, déi ëmmer erëm gesinn, datt déi Diskussiounen do net zu engem Enn kommen, a sech d'Fro stellen: Wéi geet dat Ganz da weider?

D'Fro ass also net nëmme: Si mer fir oder géint d'Bankgeheimnis? - wouriwwer et an deem Parlament e breede Konsensus gëtt. D'Fro ass: Wat kënnen d'Repercussione vun där Haltung laangfristeg si fir eist Land a fir déi Finanzplaz, wann all déi aner dee System kee gudder System fannen?

An där Situatioun si mer am Fong zënter méi wéi zéng Joer. Erënnert lech un d'Diskussiounen am Joer 2000. Mä déi Diskussione sinn net ofgeschloss, a mir wäerten nach weider an Diskussione mam Parlament déi um europäesche Plang aktiv suivéieren.

Mä domadder hänkt awer och zesummen - egal wéi wichteg dat Element am Private banking ass, an doriwwer kann ee selbstverständlech verschidden Hypothese maachen -, et ass en Element an et beweist och, datt ee muss an der Aschätzung vun den Einnahmen, déi aus dem Finanz-secteur kommen, och eng Rei Fragezeeche mat am Kapp hunn, an net einfach soen: Déi Croissance vun de Recettë geet automatesch déi nächst Joren, wéi an deene leschten zéng Joer, erop.

Ech mengen, datt eis Finanzplaz eng zolidd international diversifizéiert Finanz-plaz ass. Mä et muss ee gesinn, datt onofhängeg vun der Fro ronderëm d'Bankgeheimnis et eng ganz staark Tendenz an Europa gëtt, fir déi national Finanz-zentren erëm méi ze stäerken, an domadder och ze kucken, datt déi grenziwwerschreidend Finanzaktivitéite mander wichteg ginn.

Vu datt eis Finanzplaz virun allem vu grenziwwerschreidende Finanzdéngschtleeschungen leeft, ass dat eng Tendenz, déi mer mat enger gewëssener Suerg gesinn. Déi gesi mer och an enger Rei vun Décis-ioune vun der Europäescher Kommissioun, déi d'Auslandsgeschäft fir eng Rei Banke wëllt empêcheieren, well se dat als ze vill risikoräich ugesäit.

Mir müssen och duerfir zu Lëtzebuerg, niewent dem Encouragement vu Formatioun, niewent dem Encouragement vun enger méi sophistiquéierter Berodung vun enger internationaler Klientell, kucken, datt mer zousätzlech Aktivitéiten op Lëtzebuerg kréien. Net Aktivitéiten, déi alles aneschtens kënnen ersetzen, mä déi sech un déi Panoplie vun Déngschtleeschungen a Produkter, déi mer haut schonn hunn, derbäisetzen.

Beispiller sinn och hei an der Ried vun dem honorabelen Här Thiel genannt ginn, wéi d'Mikrofinanz, d'Philanthropie, de Finanze-ment vun Ekotechnologien. Mä alles dat ersetzt net déi traditionell Aktivitéite vun der Fongenindustrie a vum Private banking, et ergänzt se. Et mécht d'Palette méi breet, gradesou wéi eng héich sophistiquéiert, spezialiséiert Bourse a Clearing-Institutionen, déi och d'Ënnerstützung vun der Regierung wäerte weider fannen.

Mä mir müssen och kucken als Regierung, datt mer op neie Marchéen nei Clientë kréien. Duerfir ass och déi kloer Démarche vum Wirtschaftsminister a vu mir selwer, fir ëmmer erëm ze versichen, net nëmme eist Land bekannt ze maachen an deenen traditionelle Marchéen, wou mer sinn, mä och nei Dieren opzemaachen, sief et an de Golfstaten, sief et an Asien, sief et a Latäin-amerika, wou mer mander haut bekannt sinn, wéi dat vläicht soll sinn. Duerfir wäerte mer do eis Efforten an deenen nächste Méint a Jore redoubliéieren.

D'Finanzplaz bleift wichteg, a mir müssen zugläich d'Diversifikatioun vun der Economie weiderdreien. Dat eent ass net op d'Käschte vun deem aneren. Mir brauchen eng diversifizéiert staark Finanzplaz. Mir brauchen eng diversifizéiert Economie. Dat ass méi liicht gesot wéi gemaach.

Chambre des Députés

Compte rendu officiel

Supplément commun aux quotidiens:

Luxemburger Wort, Tageblatt, Lëtzebuerger Journal, Zeitung vum Lëtzebuerger Vollek

Contenu rédactionnel:

Service du compte rendu de la Chambre des Députés
Service des relations publiques de la Chambre des Députés
Tél. 466 966-1

Conception, saisie de texte et mise en page:

Polygraphic Communication SA, Differdange

Concept et coordination générale:

BRAIN & MORE, agence en communication, Luxembourg

Mä mir musse kucken, datt mir déi Atouten, déi mer haten, erëm eng Kéier an d'éischt Rei setzen. Mir musse séier Décis-ioune kënnen zu Lëtzebuerg huelen. Mir dierfen net méi komplizéiert si wéi eis Noperen. Mir musse bei den Normen net Normen asetzen, déi dräimol déi si vun eisen dräi Noperen oder d'Additioun vun den Norme vun eisen Noperen.

A mir musse konkurrenzfähg bleiwen. Dozou gehéiert och d'Steierpolitik, well déi Iddi, déi ee kann hunn, fir d'Steiere vun de Betriber ze héijen, ass eng Iddi, déi engem sympathesch ka sinn, déi funktionéiert awer an enger reeller Economie net. A wann d'Regierung an der Regierungserklärung gesot huet, datt se héchstwahrscheinlech d'Betribsbesteuerung muss senken, dann ass dat net, well se mengt, se hätt ze vill Suen, mä mir hunn eis ëmmer orientéiert un der Moyenne vun den OECD-Statene.

Dat bleift och an Zukunft d'Linn vun der Regierung. Well wa mir Steieren hunn zu Lëtzebuerg, déi vill méi héich si wéi déi vun eisen Nopeschlänner, a wa mer wëlle Betriber am Ausland unzéien, datt déi heihinner schaffe kommen an hei produ-zéiere kommen, da kucken déi natierlech op eng Rei Elementer.

D'Steiere sinn eent dovunner. Duerfir müssen d'Steieren zu Lëtzebuerg fir d'Betriber an och fir d'Leit, déi do schaffe selbstverständlech, konkurrenzfähg bleiwen, dat heescht en ligne bleiwe mat deenen aneren Economien, mat deene mer a Konkurrenz sinn. An dat sinn nämlech d'Ekonomië vun der OECD.

Mir hunn also 2010 en Antikrisebudget gemaach. Mir akzeptéiere fir 2010 en Defizit. Mä dat, wat mer 2010 maachen - wëll ech ganz kloer an däitlech hei am Parlament soen -, dat kann een net dräi-oder véiermol hannerenee maachen.

Dach, dat kann ee maachen, mä da kritt een eng Schold, déi ee sécherlech net méi zrëckbezuele kann. Da kann een zwar soen: Dat muss d'Generatioun vun eise Kanner maachen. Mä ech mengen, dat wär irresponsabel. Ech mengen net, datt een dat heibanne wëllt. An et kéint een och an eng Situatioun kommen, wou mer ganz vill Schwierigkeete géife kréien, fir iwwerhaupt nach op engem gewëssene Moment Sue geléint ze kréien.

Et ginn nun eemol Fäll an Europa, an der Welt, déi bewisen hunn, a wéi eng Situa-tioun ee ganz séier ka kommen. Dir wéi ech liest, wat geschitt ass an Island. Mir gesinn, wat geschitt ass a verschiddene baltesche Staten. Mir gesinn, wat fir eng schwierig Situatioun eis Kolleegen aus Griichenland hunn, wat och gëschter um Finanzminister-conseil natierlech e wichtegt Thema war, erëm eng Kéier, well mer jo all zesummen an enger Währungsunioun sinn.

Mir wëllen net an déi dote Situatioun kommen. Mir si wäit vun där Situatioun ewech. Mä mir hunn d'Verantwortung, datt mer net dohinner kommen. Duerfir géllt et an deene Joren 2011 bis 2014, wann ech des Legislaturperiod kucken, fir eng Rei Änne-rungen ze maachen, fir en Zil ze erreechen, wat mer eis an der Regierungs-erklärung ginn hunn.

An der Regierungserklärung steet ganz kloer, datt mer gäre gesond Statsfinanzen hätten. An zu de gesonde Statsfinanze gehéiert en ausgeglachene Budget. Wann

dat e Joer net de Fall ass, ass dat net dramatesch. Wann een dat besonnesch mat Reserve ka finanzéieren iwwer fënnf Joer, kann een dat net maachen; besonnesch och, wann een ëmmer erëm muss bedenken d'Volatilitéit vun eisen Ein-nahmen.

Wann et esou wär, datt all d'Betriber zu Lëtzebuerg géifen och déi nächst Jore ganz vill Steiere bezuelen, da wär dat kee Problem. Mir sinn der Meenung, datt een do muss ganz virsiichteg sinn, wëssend, mat wat fir engen Eerausforderunge mer konfrontéiert sinn.

Och do huet d'Regierung kloer Faarf bekannt, wéi se dat wëllt maachen. An der Regierungserklärung, déi vum Stats-minister hei virgedroe ginn ass, stinn - souwuel am franséische wéi am lëtze-buergeschen Text - déi dräi Pisten, wat och déi normal Piste sinn, un deenen ee muss schaffen:

- Dat sinn d'Fonctionnementskäschten; wat allerdéngs e Begrëff ass, wat vill méi ass wéi just deen normale Fonctionnement vum Stat. An der Definitioun Fonction-nementskäschte sinn och eng ganz Rei Ausgaben, déi de Stat mécht, déi och an d'Economie fléissen.

- Mir musse kucken, datt d'Investitiouns-ausgaben op engem héijen Niveau bleiwen. Mä déi kënnen net all Joer nach eng Kéier méi héich ginn, well dat ass net ze finanzéieren.

- A mir musse bei de Sozialausgabe kucken, datt mer déi op eng sozial gerecht a finanzéierbar Aart a Weis och an Zukunft kënnen tätegen.

Mir sinn - an dat ass ganz kloer, an ech mengen, och doriwwer wär Konsensus an deem Parlament - fir e staarke Sozialstat. Mä d'Definitioun vun deem Sozialstat ass vläicht net fir jiddwereen déiselwecht. Fir mech ass de Sozialstat e Stat, deen de Mënschen hëlleft, verschiddener vun hiren Ziler, verschiddener vun hiren Objektiver ze erreechen, déi se eleng net oder nëmme schwéier kënnen erreechen.

Mä et ass net e Stat, dee fir alles a fir all Aktivitéit a fir all Iddi vun de Leit on-bedéngt muss an allen Ëmstänn och inter-venéieren. De Stat ass kee Kleeschen an de Stat ass och keng Kaskoversécherung. Mä de Stat huet eng grouss a wichtig Aufgab, dat ass déi och vun der Solidaritéit.

(Interruption)

Här President, ech mengen, den Här Lux wëllt eng Fro stellen.

(Interruption)

Ah.

► **M. le Président.**- Fuert virun, Här Minister!

► **M. Luc Frieden, Ministre des Finances.**- De Sozialstat ass also de Stat, deen de Gedanke vun der Solidaritéit muss staark ënnerstëtzen. Solidaritéit vis-à-vis vun deene Leit, déi keng Schaff hunn oder déi riskéieren hir Schaff ze verléieren; Solida-ritéit vis-à-vis vun deenen, déi an der Krankheet sinn; Solidaritéit vis-à-vis vun deenen, déi en Handicap hunn; Solidaritéit vis-à-vis vun deenen, déi e Wunnengs-



problem hunn, an ech kéint d'Lëscht weiderfueren. Leit, déi net mat hiren eegene Mëttele kënnen eng Rei vun Ziler erreechen, déi d'Gesellschaft, a mir vertrieben déi Gesellschaft heibannen als Deputéierten, als noutwendeg fënnt.

Zum Sozialstat gehéiert och an zur Verwierklechung vun den Ziler gehéiert och, datt ee kuckt, datt mer d'Familljen, déi hei am Land mat Kanner wunnen, och ënnerstëtzen, datt se kënne fir hir Kanner eng Zukunft virbereeden, déi würdeg a liebenswäert ass.

Mä dee Sozialstat kann net reng an der Theorie entstoën. Ech ka mer an engem Sozialstat nach honnerttausend interessant Iddiën virstellen. De Sozialstat ass nëmmen en zolitte Sozialstat, soulaang en och finanzéierbar ass a bleift. E Sozialstat, dee just an der Theorie funktionnéiert, mä deen herno muss duerch massiv Scholde finanzéiert ginn, kann net funktionnéieren, an och net duerch eng substanzuell Augmentatioun vun de Steieren. Dat hu mer an der Vergaangenheet ni gemaach a mir sollten dat och an der Zukunft net maachen, well do gesi mer notament an de skandinavesche Länner, wat fir eng Kurskorrekturen déi hu misse viru Joren an deem dote Kontext maachen.

Fir eis ass och net all Émbau oder Reform am Sozialstat e Sozialofbau. Et kann een e Sozialstat hunn an et kann ee Moossnamen hunn, déi an engem gewëssene Moment agefouert gi sinn, déi een duerno diskutéiert a fënnt, datt ee se kann ëmschichten op aner sozial Ausgaben. An duerfir muss ee besonnesch an enger schwiereger Finanzéierungszeit, wou et méi einfach wier, einfach ze soen, mir loosse alles lafen, mengen ech, de Courage hunn, iwwer verschidden Ausgaben ze diskutéieren an ze kucken, ob se noutwendeg sinn, ob se an hirer ganzer Dimensioun noutwendeg sinn, oder ob ee se net kann anescht oder fir aner Zwecker cibléieren.

Kommt, mir diskutéieren am Liicht vun enger dach substanzuell international changéierter Finanzsituatioun. De luese Wirtschaftswuesstum fir déi nächst Joren an d'Volatilitéit vun de Steieren an natierlech d'Schwieregkeete vun der europäescher Ekonomie verlaange sécherlech déi eng oder déi aner Ännerung, mä déi steet net a Kontradiktioun an eisen Aen zu engem staarke Sozialstat.

Mir brauchen eng gutt funktionéierend Ekonomie, mir musse Rahmbedéngungen hunn, datt international Betriber heihinner kommen, a mir musse kucken, datt de Sozialstat finanzéierbar bleift.

(Interruption)

Mir mussen dat op eng Fassong maachen, déi an eisem Land eng Traditioun huet. An et ass duerfir, wou mer mengen, datt déi Diskussioun muss gefouert ginn iwwer eng gewëssen Zäit an datt déi Diskussioun muss gefouert gi mat all deenen, déi am Land Verantwortung hunn.

Do steet d'Regierung an enger wichtiger Plaz, mä selbstverständlech ass dat eng wichteg Roll vum Parlament an ass dat eng wichteg Roll vun de Sozialpartner. An duerfir ass d'Regierung gewillt, am Laf vum nächste Joer déi Diskussiounen ze féieren, fir ze konsultéieren, ze dialogéieren iwwert d'Ziler an iwwer Weeër dohinner.

Et bréngt näischt, fir dat ze maachen op eng Fassong, wou ee vun uewen erof eppes diktéiert. Zu eisem Stat, an och dat gehéiert zu deem Stat, dee mer zesummen hei opgebaut hunn, gehéiert en Dialog, gehéiert eng Konsultatioun, och eng Ausenanersetzung mat verschiddenen Iddiën. Ech mengen och, datt do déi Parlamentsdebatte kënnen hëllefen, well d'Stärkt vun enger Demokratie läit an ënnerschiddleche Meinungen, déi een deen anere soll dra respektéieren.

Mir hunn eis e klore Kalenner ginn. De Budget 2010 ass en Antikrisebudget, an iwwert déi Joren duerno musse mer konform zu den europäeschen Diskussiounen kucken, wéi mer aus dem Defizit erauskommen. Déi sougenannten „exit

strategies“ - wat e grousst Wuert ass, fir am Fong de Bon sens ze beschreiwen - sinn, wéi ee graduell iwwert déi nächst Joren an Europa, an duerfir och heiheem, aus dem Defizit erauskënnt a wéi een évitéiert, datt d'Verschëldung vun de Staten an Europa klëmmt.

Ech soen nach eng Kéier, d'Verscholdung spiert een net direkt. Keen, deen an der Groussgaass spadséiert, spiert, wann de Stat Schold huet. Mä déi, déi a Joren duerch d'Groussgaass oder d'Uelzechstrooss spadséieren, déi spieren et, wa se mussen déi Schold zrëckbezuelen.

Et ass eis Verantwortung haut, och wann et méi einfach wär, Schold ze maachen, fir ze évitéieren, datt déi, déi no eis kommen, net vun esou enger gudder Finanzsituatioun kënne profitéieren, wéi déi, déi mir geierft hunn an déi mir an deene leschten zéng Joer gemaach hunn.

Här President, de Budget 2010 ass e Budget, deen eng zolidd Äntwert op d'weltwäit Wirtschaftskris gëtt, eng zolidd Äntwert op d'Repercussione vun där Wirtschaftskris heiheem. Et ass en Antikrisebudget, et ass e Budget, dee gewollt d'Ekonomie an d'Leit hei am Land ënnerstëtzt.

Et ass en Antikrisebudget, deen deenen hëlleft, déi hir Schaff riskéieren ze verléieren oder verluer hunn, datt déi notament duerch héich Ausgabe vum Fonds pour l'Emploi zolidd ënnert d'Äerm gegräff kréien. Dat ass de Gedanke vun der Solidaritéit, dee fir eis noutwendeg ass.

En ënnerstëtzt d'Kafkraaft vun de Leit, well mir hunn d'Steiersituatioun net geännert fir d'Joer 2010, well mer net wollten do eng Brems an de Konsum an an d'Investitioun vun de Privatleit aleeën. En ënnerstëtzt d'Betriber duerch héich Investitiounen an och do duerch e Status quo bei der Steuerlaascht.

Dësen Antikrisebudget kënne mer, wéi gesot, finanzéieren duerch Reserven an duerch eng zousätzlech Schold, déi mer wäerten d'nächst Joer ophuelen. Mä d'Zil vun der Budgetpolitik, vun der Finanzpolitik vun der Regierung bleift mëttelfristeg gesond Statsfinanzen, esou wéi dat an der Regierungserklärung steet, déi vun deem Parlament ugehall ginn ass. Net héich Schold an net héijen Defizit kënnen eis Linn sinn, well si maachen d'Liewen an deenen nächste Jore vun deenen, déi dann hei liewen, extrem schwéier.

Mir brauchen also als Objektiv ausgeglachte Statsfinanzen - mëttelfristeg -, a mir brauchen als Objektiv en Émfeld, wou d'Betriber och an Zukunft op Lëtzebuerg kommen, wou och d'Betriber an Zukunft zu Lëtzebuerg Aarbechtsplaze schafen, wou Kompetitivitéit par rapport zu aneren Ekonomien och besteet, an domadder finanzéiere mer e staarke Sozialstat, bei deem de Gedanke vun der Solidaritéit, de Gedanke vun der Hëllef fir déi, déi et am meeschte brauchen, muss am Vierdergrond stoen. Net e Sozialstat, deen alles mécht, wat en herno net ka finanzéieren.

Duerfir wëlle mer am Dialog - ech soen lech et nach eng Kéier - mat der Chamber, am Dialog mat de Sozialpartner an och de Leit hei am Land - well déi hunn och eng Meinung zu där Fro, déi wëssen och, wat et heescht, wann ee manner erakritt an dann ee Moment muss manner ausginn -, mat all deene wëlle mer d'Zil vun eise mëttelfristeg ausgeglachene Statsfinanzen erreechen.

(Interruption)

Do, wou de Konsensus méiglech ass, siche mer en a begrësse mer en. Do awer, wou de Reformwëllen oder den Diskussionswëlle guer net besteet, schéngt et eis noutwendeg, datt mer dann eis Verantwortung als Regierung iwwerhuelen. Et geet dorëm, d'Dépensen ze iwwerkucken; et geet dorëm, d'Recetten ze iwwerkucken. An do, mengen ech, muss een ouni Tabu an ouni Ideologie eng Rei Diskussiounen féieren.

Spueren nëmme bei deenen anere kann net d'Léisung sinn. Steieren, ouni d'international Konkurrenzfäegkeet a Fro ze stellen, ze diskutéieren, ass selbstverständlich. Dat hu mer och an deenen aneren, an deene leschte Jore gemaach. Dat muss och an dëser Debatte noutwendeg sinn.

Sommaire des séances publiques Nos 8, 9, 10 et 11

5830 - Projet de loi organisant l'aide sociale	pages 102-104
6082 - Débat d'orientation au sujet de la 15e Conférence des parties à la Convention-cadre des Nations Unies sur le changement climatique (UNFCCC) à Copenhague	pages 104-117
6079 - Débat d'orientation sur le financement des grands projets d'infrastructure réalisés par l'État	pages 117-122
Ordre du jour	page 122
Intervention de M. Xavier Bettel concernant l'annonce du retrait du rôle des affaires du projet de loi 6054 par M. le Ministre François Biltgen dans les médias	page 123
Communications	page 123
6086 - Proposition de loi concernant des mesures à prendre contre les licenciements économiques abusifs	page 123
Ordre du jour	page 123
6100 - Projet de loi concernant le budget des recettes et des dépenses de l'État pour l'exercice 2010	
- Rapport de la Commission des Finances et du Budget	pages 123-127
- Exposé de M. Luc Frieden, Ministre des Finances	pages 136-140
6019 - Projet de loi relatif à la mise à niveau des annexes A, B et C du Palais de la Cour de justice des Communautés européennes à Luxembourg-Kirchberg	pages 127-128
6043 - Projet de loi relatif à la construction de la Maison des Sciences humaines à Belval	pages 128-130
6061 - Projet de loi relative à la construction de la deuxième phase du Laboratoire National de Santé à Dudelange	pages 130-131
5823 - Projet de loi sur les permissions de voirie et modifiant la loi modifiée du 16 août 1967 ayant pour objet la création d'une grande voirie de communication et d'un fonds des routes	pages 131-134
Question avec débat N°4 de M. Jean Huss au sujet de la lutte antitabac de 2006	pages 134-135

Mir musse béid Säite vum Budget am Liicht vun der internationaler Finanzsituatioun kucken.

Mä mir mussen och d'Reformen, ouni Klassekampf an ouni ee géint deen aneren auszespillen, féieren, well et soss, mengen ech, net an där Aart a Weis ka virugoen, wéi mer dat an der Vergaangenheet fäerdeg bruecht hunn, an ech sinn dovun iwwerzeegt, datt mer dat fäerdeg bréngen.

Et geet schlussendlech an dëser Debatte net ëm abstrakt Chifferen. Et geet ëm Chifferen, déi eppes ze doen hu mat eisem Land a mat deene Leit, déi hei am Land wunnen. Et geet net ëm déi nächst Wahlen. Et geet ëm de laangfristige Succès vun eisem Land. Et geet ëm d'Qualitéit, ëm d'Liewensqualitéit hei am Land, an dozou gehéieren, fir déi ze erreechen, och gesond Statsfinanzen.

Et geet also via d'Finanzpolitik - an duerfir freeën ech mech op déi Debatten, déi an deem Parlament an deenen nächsten Deeg, mä virun allem och an nächste Joer stattfannen, an och dobaussen, well och déi Debatte si wichteg - dorëm, eng Gesellschaft ze schafen, an där et enger-säits eng grouss Solidaritéit gëtt a wou anersäits Aarbechtsplazen duerch gutt Kaderbedéngungen och an Zukunft geschafe ginn.

Fir dat, wat eis charakteriséiert a verbënnt, fir dat awer och, wat eis Virgänger opgebaut hunn, a verännerte Konditiounen ze erhalen, duerfir musse mer, ob mer et wëllen oder net, eng Rei Ännerungen virhuelen. Wien haut stoe bleift, fält muer zrëck.

De Budget 2010, fir deem seng Zoustëmmung ech hei am Numm vun der Regierung bei der Chamber plädéieren, well et eng Äntwert ass op d'Kris, gëtt eis d'Zäit, fir an deem Krisenjoer 2010 Reforme fir no der Kris konstruktiv, hoffen ech, ze diskutéieren, well d'Zäit no der Kris wäert sécherlech e bëssen anescht si wéi d'Zäit virun der Kris. Wien déi Meinung net deelt, deen, mengen ech, sollt et soen, an och, firwat e mengt, datt d'Situatioun vu virun der Kris géif liicht an Europa an heiheem erëmkommen. Mir mengen, datt eng Réi Ännerungen noutwendeg sinn an datt mer net kënne jorelaang mat defizitäre Budgete fueren.

Am Fong ass eis Aufgab schwier, an trotzdem muss ee Respekt hu virum Courage, virun der Wäitsicht vun deenen, déi virun eis Krise géréiert hunn. A mir sollen eis un hinnen e Virbild huelen: Déi, déi nom Zweete Weltkrich eist Land an eis Ekonomie erëm opgebaut hunn, an déi, déi no der Stolkris eist Land a seng Wirtschaft diversifizéiert hunn, iwwerall do fanne mer Elementer vun Äntwerten, déi eis och an dëser Kris wäerten hëllefbräich sinn.

Ech wënsche mer op jidde Fall als Finanzminister en zukunftsorientéiert, reformfäeg, attraktiv Land, fir kënnen ze liewen a fir ze schaffen, an d'Finanzpolitik spillt do natierlech an deem doten Zil eng éischt Gei.

Mä nëmmen, wa mer eis zesummesetzen, wa mer zesummen iwwert déi eenzel Pisten do diskutéieren, zesumme fir d'éischt awer och iwwert d'Objektive vun eisem Stat a vun eiser Finanzpolitik diskutéieren, ouni Tabu an ouni ideologesch Scheiklappen, ech mengen, da géife mer och mat klengen Ännerunge Grousses kënnen erreechen an och mat engem neien Élan eist Land op d'Zukunft kënne virbereeden.

Virun eis läit eng grouss Aufgab. De Budget 2010 setzt éischt Jalonen dovunner als Äntwert op d'Kris, mä et kënnt och eng Zäit no der Kris, a wa mer déi richtig upaken, dann ass et mer net baang ëm d'Zukunft vun eisem Land. Mä mir brauchen en neien Élan, fir deen d'Finanzpolitik wäert hire wesentleche Bäitrag leeschten.

Merci.

► **Plusieurs voix.**- Très bien!

► **M. le Président.**- Ech ginn dem Finanzminister Akt vu senger Deklaratioun. D'Debatten iwwert de Statsbudget fir d'Joer 2010 fänken d'nächst Woch en Dëschdeg un.

Domadder si mer um Enn vun eiser Sitzung ukomm. Déi nächst Sitzung si virgesi fir den 8. an den 9. Dezember.

D'Sitzung ass opgehuewen.

(Fin de la séance publique à 15.33 heures)